

Pembangking Dakwa Ada Bukti 8 Pengundi Hantu Cemar PRU-13
mStarOnline
21 Mei, 2013
Oleh ARIFFUDDIN ISHAK

PETALING JAYA: Parti Keadilan Rakyat (PKR) mendakwa Pilihan Raya Umum ke-13 (PRU-13) yang lalu dicemari penipuan apabila wujudnya 'pengundi hantu' yang menggunakan kad pengenalan palsu yang dikeluarkan Jabatan Pendaftaran Negara (JPN).

Pengarah Strategi PKR, Mohd Rafizi Ramli berkata sehingga kini terdapat lapan individu dari seluruh negara tampil membuat laporan polis yang mendakwa dihalang daripada membuang undi kerana nama dan kad pengenalan mereka sudah digunakan oleh individu lain.

Daripada lapan individu berkenaan, empat daripadanya dilaporkan berlaku di Selangor membabitkan kawasan Parlimen Kuala Selangor, Serdang, dan Shah Alam manakala masing-masing satu kes di Kedah (Sungai Petani), Kelantan (Tumpat), Terengganu (Kemaman) dan Negeri Sembilan (Rembau).

"Daripada semua kes yang kami terima setakat ini, ia membuktikan wujudnya kad-kad pengenalan palsu yang dikeluarkan JPN dan diberikan kepada individu tertentu bagi tujuan menjadi pengundi hantu.

"Wujudnya kad pengenalan berlainan untuk membolehkan orang lain mengundi dengan menggunakan identiti seorang rakyat Malaysia yang sah adalah amat membimbangkan. Ia bukan sahaja mengesahkan kehadiran pengundi hantu, tetapi membayangkan kegagalan JPN menjamin bahawa kad pengenalan adalah tulen, selamat dan unik kepada setiap rakyat Malaysia," katanya.

Pada sidang media yang sama Ahli Parlimen Pandan itu turut mengedarkan lapan salinan laporan polis oleh kesemua individu berkenaan.

Selain itu menurut Mohd Rafizi, pihaknya sedang berusaha untuk mendapatkan persetujuan kesemua individu tersebut untuk membuat Akuan Bersumpah (SD) bagi mengukuhkan dakwaan mereka.

Hakcipta Terpelihara © 1995-2013 Star Publications (Malaysia) Bhd

Source:

http://mstar.com.my/berita/cerita.asp?file=/2013/5/21/mstar_berita/20130520144948&sec=mstar_berita

